

丽水市地方志编纂委员会整理

处州府志 (标点本)

【第三册】

清 潘绍诒修 周荣椿等纂



方志出版社

丽水市地方志编纂委员会整理

处州府志（标点本）

【第三册】

清 潘绍诒修 周荣椿等纂



方志出版社

《处州府志》卷之十九

处州府知府元和潘绍诒重修

人物志上 理学 忠义殉难附

理 学

道学之名昉于宋。栝之尚理学，则始于龚深父，甌栝贤士，翕然宗之。南渡以后，如项安世、潘景宪、陈葵、王光祖、应恕辈，皆为朱子所引重。尹起莘，世称紫阳功臣。各有著述，羽翼经史。理学渊源，有自来矣。

宋

应恕 字仁仲，丽水人。学者称艮斋先生，朱子尝以老友呼之。其所与论学书，一论《大学》、《中庸》，一论《礼》、《书》，一论《易本义》。且云尚恨闻见浅薄，望赐海谕，勿使有待于后世子云。其见重如此。恕寓居台州，故亦传为台人云。

吴梅 字仁伯，丽水人。从北山先生何基为师，基教以真实坚苦。著书名曰《四书发挥》，参质于鲁斋先生王柏。任浦江县尉，改钱塘县尉。

潘翼 字雄飞，青田人。治经史及天文、地理之学，作《星图》，著《九域赋》及《补注韵略》。永嘉王十朋出其门。十朋知泉州，欲为翼刊所注，会召不果。

陈葵 字叔向，青田人。自少笃学，至老不倦。举隆兴进士，知平阳县，居官廉介。父病不解衣数月，兄弟相友爱。师事魏益之，因教以尽弃所怀，独立于物之表。未久，忽大悟，洪纤大小，高下曲直，若有见焉。且疑吕伯恭读书徒多，朱元晦修方不疗时政。

又尝自言用功益难，进道愈远。古人今人，皆未可轻议。晦翁每重其学术，士有志者必使往从之，曰：“可以寡过也。”又与其子书曰：“过青田，不可不见陈叔向。”

王梦松 字曼卿，青田人。笃志好学，六经、诸子百家靡不淹贯。尝曰：“学以躬行为本，徒知无益也。”指孟子四端，即舜禹道心之微。每于此心萌动处下工夫，主敬以存养之。题座右云：“常行细务无非学，把住初心便是人。”师事西山叶味道，尽领考亭宗旨。隐居不仕，教授门徒。其高弟余学古以《礼》抡魁，子述以《礼》太学上舍。释褐登其门者，簪连袂接，造就皆有成验。著有《论语解》十卷、《学庸解》五卷、《孟子解》七卷、《易解》十三卷、《书解》十卷、《礼记解》五卷、《杂著》二十卷。当时学者称为顺斋先生。

余学古 字学道，青田人。由宝祐间进士，初任太平州教授。著《大学辨问》一卷，刊于州学。终国子正。

陈邦衡 字伯明，缙云人。性高洁，无宦达意。隐居教授，作式乡邦。同弟邦钥，师朱子，穷性命之理。

詹价 字敬父，缙云人。朱文公高弟，文公深器之，荐于朝，官至儒林郎总领所干官。学者称为玉涧先生。

赵顺孙 字和仲，缙云人。以《春秋》荐礼部第二，召试馆职，累官同知枢密院。度宗命掌丞相印，辞谢间，忽中疾，赐肩舆还第。疾愈，除资政殿学士。平生用力于朱文公四书，从游者众。既第，即裒及其门人所记有益于后学者，类于集注之下，名曰《四书纂疏》，刻于乡校及所治州郡。

叶季韶 字承之，缙云人。举进士，授临安教授，以疾辞归。执经吕东莱之门，明性理之学，无心仕进，吟啸自适，有古逸民风。著有《兰谷集》。

蒋世珍 字君聘，缙云人。尝从朱子高弟潜室先生游。开庆元年进士第二人，官至从仕郎，镇江、建德、温三州儒学教授，学者宗之。

叶梦得 案：《宋史·侍从传》：叶梦得，字少蕴，吴县人。登进士，除婺州教授。以蔡京荐，为武选编修，累迁翰林学士。高宗时，历官至福建安抚使。请老，拜崇信军节度使致仕，卒赠检校、少保。《浙江通志》亦无其名，惟处州府县志均列入《人物》。尚有叶味道、叶适，俱温州人；真德秀，浦城人。《人物志》均为立传，附会里居、茔墓。嘉庆间，教授张作楠著《梅篴随笔》载，涂淪庄郡伯建栝苍九先生祠于莲城书院，率诸生行释菜礼。九先生中，松阳叶石林，龙泉叶水心、真西山，皆非处州人，乃作志夸饰故习，跻之乡先生中，殊嫌假借，惜未敢重请厘正云。是承讹袭谬，樊附铺张，由来旧矣。遽为删除，庸俗疑讶，因均存其名，不载事迹，并引史书所载以证之。至诸贤本非栝人，所有著述，列诸旧志、各县志者，《艺文·书目》概不登记，以昭核实。

项安世 字平甫，松阳人。七岁能赋诗，长治《春秋》。教授绍兴时，朱文公为浙东提举，乃相与讲明义理之学。后文公在经筵，荐人为谏官，召试馆职，除秘书省正字。尝上疏曰：“陛下仁足以覆天下，而不能施爱于宫闈；量足以容群臣，而不能隐忍于父子。”上不听。已而，闻旨召姜特立赴阙，复上疏曰：“小人在侧，譬养盗贼于室中。禁一缓，为祸不测。乞早寝召命。”在朝建白多类此。累官龙图阁。庆元初，坐党籍罢。

潘景宪 字叔度，松阳人。以童子中礼部选，入太学，一时学官如王十朋辈咸器重焉。与吕伯恭同擢进士，以己学不及伯恭，遂师事之。与朱子友善，申以婚姻之好。会朱子江西使事人对，作书告曰：“甚愿一见，以慰离索。然子今日之行，名为召客，是以不果，及以口语。”罢归，又书告曰：“子今几过七里滩矣。”朱愧不能答。及卒，朱子为撰祭文墓铭，谓其躬行之效，内则孝悌著于家，外则仁义信于友，而竟不能随世俯仰，一日致身于仕路云。

王光祖 字文季，松阳人。官大理评事，精于理学。朱文公提举时，邂逅邑之福安僧舍。文季拱立，规掌如太极状。公即异之

曰：“王子胸中自有太极。”间以传注质之，文季曰：“公注《中庸》，不使滋长于隐微之中。愚意当加‘潜暗’二字。”公深然之。后数以诗文往复，有《寄孙竹湖书》曰：“吾到括，止得士友王文季一人而已。”

项复 字吉甫，松阳人。尝从慈湖杨先生学。一日，先生问曰：“学而时习，作如何说？”吉甫仓卒无以对，但云：“不谈口生荆棘。”先生抚几叹曰：“正是此说。”吉甫由是警悟，学业益进。晚年，有荐之于朝者，以白衣授校书郎，隐居不仕，自号耕乐。

王道深 松阳人。隐居力学，究极性命之理。朱晦庵见之与语，大悦。叶符叔亦嗜理学，尝请朱晦庵书“敬斋箴”以赠之，大加敬异。

刘炎 字子宣，松阳人。少侍父遯斋先生，习闻廷训，专事程朱之学。因庆元党籍，隐不仕，从真文忠游。著《刘子述言》十二卷。其略曰：中天地而立与天地参者，人也。天命以人不物之矣，天不物之，而自待以物始也，人终去禽狎不远矣。然则人之性，天地之性也。孔以为贵，孟以为善，天地予人之正也。荀卿谓之恶，主血气言之也；扬雄谓之混，杂人与物言之也；韩愈品分之，是犹以清浊之气、高下之质言之也。荀、扬、韩之言性，皆非天地予人之正也。君子保天地之性之谓仁，成天地之性之谓学。其言行于世。

王佐 松阳人。领乡荐，入太学，寻补武学博士，召试学士院，对策，言用兵起衅不便。时韩侂胄欲藉此立功，见策愤然，讽御史胡纆劾佐狂妄，出判潼川转运司事。佐莅官政善，人赖休息。尝作《利州学记》，谓圣人之道，以修己治人为要，而世方以道为伪；以穷理明经为儒，而时方以儒为党。是非出于一时公议，定于万世。四川安抚使程松以为讥讪朝政，奏闻，落职，主管鸿禧观。归之日，单车就道，篋惟衣册而已。

龚原 字深父，遂昌人。宋嘉祐进士，为国子直讲，历太常博士。时方议祀北郊，原曰：“合祭，非礼也。愿亟正之。”加秘阁校理，除王府记室、两淮转运判官。绍圣初，上拜国子司业，人对，帝

问曰：“卿历除邸官，何为补外？得非大臣私意乎？”对曰：“臣出使乡部，知民间事宜。臣素志如此，不知其因也。”旋兼侍讲，迁秘书少监、起居舍人，擢工部侍郎。安惇论其直讲时事，以集贤殿修撰知润州。徽宗初，入为秘书监，进给事中。时除郎官五人，皆执政姻戚，悉举驳之。又论郝随罪不得居京师，邓洵武不宜再入史院。朝论谓帝于哲宗服当循开宝故事，为齐衰期。原曰：“三年之丧，自天子达于庶人，一也。”主议者斥其妄，黜知南康军，改寿州。俄用三年之制，乃复修撰，知扬州，还历兵、工二部侍郎，除宝文阁待制，知庐州。陈瓘击蔡京，原尝与瓘同师陆佃，谓原实使之，夺职和州，居三觉堂，萧然晏坐终日。起为亳州，命下而卒。初，邑人未知学，原笃志明经，致身通显，由是翕然化之。是时，周、程诸先生犹隐濂洛，原以经学为世表倡。凡永嘉先辈以经学鸣者，渊源皆出于此。著《易解》等书，颁布天下。号武陵先生，邑人绘像立祠于学。

周南 字南仲，遂昌人。自号知常叟。壮岁束书游四方。当建炎初，见李易作状元，遂无意仕进，乃受潘子醇《忘筌书》以归，与邑士子论学。其讲《易》由静极生动，乾生于坤，因归其说于坤之六二，大抵皆祖忘筌而暗合于归藏。时人称之为知常先生，以《易》学著名。后祀于学。

郑克宽 字伯厚，遂昌人。居航头，游松阳颍庠，就项平甫得闻朱子之学。由进士授严陵郡博士，积阶至朝议大夫。

尹起莘 字耕道，遂昌人。隐居不仕，学问该洽。有感于古今治乱兴亡之变，因朱子《资治通鉴纲目》为著《发明》五十九卷行于世，魏了翁称其深得文公之意。祀于学。

叶适 案：《宋史》本传：叶适，字正则，与戴溪俱永嘉人。《浙江通志》温州人物，详《名臣传》，并列《儒林》。《温州府志》亦入《名臣传》。《四朝闻见录》载：胡纮道出衢，从太守觅舟客次，偶与水心先生遇。时犹未第，气势凌，忽厉声问曰：“高姓仙里先生？”应曰：“永嘉叶适。”诘曰：“何干至此？”先生曰：“亲病求医。”纮以手自摇

紫窄带，叹曰：“此所谓亲病在床，入山采药。”先生恍然，莫知其所以见讶者。太守素稔先生名，命典谒语胡少焱，先请叶学士，胡尤不平云。其时庆元未置县，絃固龙泉人也。叶绍翁以龙泉人记本邑近事，则适为永嘉人，不辨自明矣。

叶味道 案：《宋史》本传：叶味道，初名贺孙，以字行，更字知道，温州人。师事朱子。学禁开，登嘉定十三年进士第，以秘省著作佐郎卒。《浙江通志》列《儒林传》，《温州府志》亦入《儒林传》。

真德秀 案：《宋史》：真德秀，字景元，浦城人。《浙江通志》无名，仅见于雍正旧志。乾隆《龙泉县志·人物》、旧志《山水门》昂山条下，又注真德秀生于此，因号西山。是因昂为西宿，从而附会。道光十三年，李遇孙纂《栝苍金石志》引宋文宪《龙渊义塾碑记》有“水心叶氏，西山真氏后，先以学鸣”语，指以为据。夫《宋史》成于元，去文宪不远，史果误作，《浦城记》中何无一语辨正？通志亦载此记。并据《栝苍汇记》，真西山宅在龙泉西山，因号西山，示不忘本云。未尝据此列入《龙泉人物志》。总之，浦城、龙泉接壤，往来寄寓，诚未可知。若以学鸣者，言其兴学于龙，非定指为龙产也。叶绍翁《四朝闻见录》载浦城乡校芝草云：庆元间，为儿时，父兄携入乡校，见芝草二本，文忠真公遂登乙科，继中鸿博。叶子奇《草木子》云：真西山将会试于行在，道经吾栝。二叶皆龙泉人，亦不以西山为邑人。后人背史立异，名为考据，直攀附耳，删之。转骇流俗，因仍其名，不载事迹，为之辨证。

元

俞杰 字仁仲，丽水人。授将仕佐郎、处州路儒学教授。尝辑先儒遗论，著《论语训蒙》。

何清臣 字学可，丽水人。南平先生之子，通《春秋经》，诚意伯刘伯温师之。

王文焕 一名子敬，字叔恭，松阳人。少负雅操，夙承家学。

以元季之乱，不屑仕进，遂取孔、孟诸儒绪言，研极精微，著《道学发明》、《大学发明》、《中庸孟子解》及《心境图》、《治心铭》诸作。叔恭以心为明镜毋自欺，为药物畏敬恐惧，克复省察，为工夫巍然负泰山北斗之望。学者宗之，称为西山先生。

王毅 字刚叔，龙泉人。少颖异，家贫不能致书，每借书于市，诵辄不忘。稍长，父使视春，挟册坐碓侧，米成粉不知也。旋观《太极图》，谒金华许文懿公于山中，悟理一分殊之旨。循淮泗，溯黄河，睹泰山，鳧绎徘徊阙里，怅然有千载之思。北至燕京，荐绅先生若黄文献公、揭文安公、欧阳公玄、危公素，争相引重，有荐为检讨、编修者，皆引分固辞。俄还乡里，以躬行实践为教，一邑化之。胡深、章溢、叶琛、叶世杰、季汶，皆及门高弟。邑饥，告令长计口授食，余粟尽借平民，赖以存活者悉感泣。至正中，荆襄兵起，寇犯县南，佐将军石抹宜孙，颇有赞画。未几，青田贼潘贤三等扬言攻县，长吏台宝忽丁遁，贼遂陷县焚掠。因召门人章溢、季汶等部勒乡兵，逐杀群贼，县遂复。大府录功，赉以金帛，毅曰：“得贤令抚残黎，则拜赐多矣。”谢不受。已而，部使者下令正长吏罪，台宝忽丁恚甚，集季溪恶少据险方命害毅于家，年五十有二。县人无少长，皆痛愤思复仇。时胡深方参军事于鄱阳，驰归，与同门友告方伯连率帅师剪夷之，越二年始平，乃葬于盖竹之西山，别建祠而尸祝之。配叶氏、娄氏皆无子，以兄之子彦珣嗣。著有《木讷斋文集》行世。

明

王廉 字希阳，丽水人。为人修整，博通五经，尤精于《易》。虽子史百家、天文、律历、兵刑等书，靡不淹贯。洪武初，荐入翰林，修史书成，授太子说书，官至陕西左布政使。所著有《交山集》、《迂论史纂》、《南征录》、《四书详说》。又善琴，制风木吟。字宗韩择木，兼精篆隶。

何镗 字振卿，丽水人。嘉靖二十六年进士，授进贤令，用法

不阿权贵。量移开封府丞，厘奸剔弊，强宗为之敛手。以能擢守潮阳，张璉等构乱，计擒其魁。督学江右，勉诸生以身心性命之学。后迁云南参政，以乞养归。抚按屡荐异才，擢广东按察使、河南布政使，不起。投闲数十年而没。所著有《游名山记》、《修攘通考》、《翠微阁集》。崇祀郡学乡贤。

王一中 字石门，丽水人。自幼孝敬，中丁未第四，历三邑，皆以清廉著。在古田，拔陈宏德于囹圄，后荐贤书，闽人至今为美谈。考选，授广西道御史，疏罢内市，纠保姆客氏、权珰魏忠贤。巡按山东，荡平妖寇徐鸿儒等。升京卿，首推操江都御史，忠贤以夙愤，于会推降旨削夺。居家十余载，奖引后进，述五经，辑郡乘，屡荐不起。日以道德性命之学，与诸子相研究，尤深于《易》。凡天文、地理、诸子百家，以至马、班、范、陈之史，稗官杂说，靡不探讨。再擢光禄，召对称旨，以不附时要调南光禄。屡疏乞休，寿七十有二。祀乡贤名宦。所著有《瑞芝堂集》、《经书疏解》、《东巡疏草》、《禄勋草》、《柱下焚余》诸书。

郑虞唐 号宝水，缙云人。少聪颖，善属文。弱冠，举天启丁卯乡试，问学南屏，深有契于姚江之学。屡困礼闈，益讲求经世之务。父母高年，晨昏起侍如孺子，养葬竭尽孝道。著《两汉语林》、《春秋引断》、《易蒐》诸书。祀乡贤。

毛仲 字时正，松阳人。学有原委，好辟异端，尤精图学。尝诵节孝徐先生三善之言，以自砥砺，笃志孝友。以宾贡授海阳令，仗忠信，敦教化，吏民不忍欺。然秉性刚介，当道不合，甫期月，遂谢事归。所著有《常道异端论》及《理数启钥》。

卢玘 字舜用，松阳人。家贫力学，怀抱甚高。天顺甲申第进士，廷策近万言，切中时弊。李贤当国，欲罗致之，不屈。遂上疏请正宫闈名分及阉寺引浮图煽惑事，言甚剴切。执政外忌，万妃内短，疏入不报。未几，复诋权贵，谪戍铜鼓。汪直临边，讽使见之，许其入朝。玘曰：“此膝不屈于人久矣。”益厉志理学，辩论古今未

定之说。其《辟元刘谧三教平心论》，可与《佛骨表》并称。作《贞字补遗十目》，其图说深得圣贤之旨。其杂论责宋旧臣遗士不应仕元，异端不生于天地之间，与订诬诸说，俱出人意表。孝宗时在东宫，已闻其名，即位诏起，已不可复作矣。

朱应钟 字阳仲，遂昌人。天资警悟，笃学励行。尝结青山白云楼，读书其中。善古文词，尤工唐人诗。家故饶，一委之兄弟，侈用废业不问也。闻王阳明先生倡道绍兴，往从之，深为器重。一时名公若开化方豪、青田陈中州辈皆与之游，著声吴越间。年三十二而卒，士林痛惜之。有《阳仲诗选》五卷。祀乡贤。

黄灏 字季荣，遂昌人。博学自淑，不乐仕进，人多与之游。尝语人曰：“为学大要，在慎徽五典而已，舍此皆赘疣也。”有《慎徽遗稿》，言多简要。门人私谥为慎徽先生。《通志》入《儒林》。

郑还 字复正，遂昌人，号半翁。幼孤聪悟，志尚高迈，行己峻洁。年十八，从松阳卢玠学，粹然一出于正。为文务期实用。以贡为曹州训导，教人忘倦。五年移疾致仕家居，谈道自乐，未尝轻至公府。所著有《图学蒙谈》、《理气管见》、《一元付笑》、《乡党须知》诸书行世。祀乡贤。

刘应时 字瑞生，遂昌人。究心理学，力辟佛老家言，不随时俯仰，言动严正。以明经除西川荣县令，免运茶税，盐引折色，卓有廉名，以诬误报罢。所著有《易经解》、《四书讲义》等书。案：遂志作国朝人。

叶子奇 字世杰，龙泉人。至正庚寅，署县事，府判叶景渊荐试方州，中第四人，退隐不仕。明初龙凤八年，浙江行中书省以学行荐廷试，中式，授岳州巴陵簿。洪武十一年春，有司祭城隍神，群吏窃饮猪脑酒，县学生发其事，子奇适至，株连逮狱。用瓦磨墨，有得辄书，号《草木子》。事释家居，续成之。曰《草木子》者，以草计时，以木计岁，以自况其生也。里人王刚叔从许谦受理一分殊之旨，子奇游刚叔门，叹曰：“圣贤之学，不贵多闻，以静为主。”因自号

曰静斋。

国朝

端木国瑚 字子彝，一字鹤田，又字井伯，晚号太鹤山人。明季，由溧水徙青田。祖桧、父成章，皆诸生。国瑚少负异姿，未冠补学官弟子。嘉庆丙辰，阮文达公视学浙江，案牘试画虎赋，得国瑚卷，大奇之，谓之青田鹤。檄赴敷文书院肄业，寻招居署之西园，有定香亭，命赋之。赋成，海内传诵。年二十六，中戊午科举人。明年，文达佐朱文正公主会试，甚望得国瑚卷，竟被放。戊辰，大挑知县改教职。乙亥，选授归安教谕。明年，迎继母杨就养署中。在任十五年，清介绝俗，未尝妄受一钱。而贫士有志者，辄分俸振之；有独行异节者，则力表扬之。为多士劝士皆自励。道光十年，宣宗成皇帝改卜寿陵，谕宗室、大臣各举所知，那制军彦成禧、尚书恩得杨曾《地理元文注》以献，上问近臣知此人乎？曹文正对曰：“此人浙江名士，臣久闻其名。”遂诏浙江巡抚刘公彬士召之，国瑚方倚隐囊注《周易》，闻命颠出坐后，左右扶之起，乃曰：“嗟呼！吾竟以方技名乎？”寿陵既定，将以知县用。国瑚谒原荐者，为奏曰：“端木国瑚，大挑一等，不愿为县令。故改授教官。”上乃特授内阁中书，加六品顶戴。人以是益高之。国瑚自言生平厉志于学，本期通经致用。今以末技受知，初非本志。惟敬谨从事，以期报称焉耳。年六十一，登癸巳进士，仍以知县复请改归中书，盖先后三辞县令云。国瑚性清高，逸情遐想，不知有尘世之富贵。好学深思，通天人之奥。旁及阴阳术数之书，无不研究。为诗古文，出语必耐人咀嚼。尤深于《易》，属稿十有六年而后成。杭州龚舍人自珍治经有声，傲睨一切。丙戌在京都，与国瑚论《易》，叹为闻所未闻。丁酉，朝鲜使臣入贡，通问致殷勤。且曰：“君所为《定香亭赋》，东国人皆传诵云。”已，请讲《易》，国瑚为发挥旁通之旨，援引证明，皆履心而后去。是岁，梓《周易指》成，遂以秩满告归，侨居瑞安。九月，遂昌吴

进士世涵迎致其家，以疾卒，年六十有五。十月，葬湖州仁王山。门生故人为置墓田，岁时酌荐不绝，仍拊祀岷山苏公祠中。乙巳，巡抚梁公题请从祀乡贤。所著有《周易指》四十五卷、《太鹤山人诗集》十三卷及《周易葬说》、《地理元文注》，皆行于世，文集四卷藏于家。子二，长百禄，自有《传》。

丁汝廉 字泉之，缙云拔贡。学宗朱子，以主敬存诚为本。年十三，父国辅以谒选卒于都，讣闻，哀毁若成人，知读丧礼。后从青田端木太鹤游，甚器之，赠以《苦读吟》。郡伯涂淪庄钦其行，礼为五云院长。四十余年，无私谒。官长下询，必务引以当道。课徒有条，门下士后先蜚声者二百有奇。或遇俦辈忿争，挟盛怒来，坐与语立平。县有唆构者，尝自叹曰：“余每见丁先生，此心不敢生事者累月。”戊午，粤寇黄闻其名，迫欲见，正色拒之，贼不能屈。辛酉，复躡缙，伪守将邹致辞问候，廉谕以顺逆，辞义凜然，为遁去。

忠 义

刘璟移孝作忠，不愧文成令子；龚楫舍生取义，不堕深父家声。他若仗节不屈，祝发全贞，百折不回，一行不苟之侣，皆足翼世教而示来兹者。世尝谓古今人不相及，抑思咸丰戊午、辛酉间，士大夫阖门殉节实难，更仆数至乡里，健儿同仇敌愆，甘蹈白刃而不悔，皆无所为而为之者也。乌可以不书。论次忠义，并附殉难姓名，俾垂不朽。

宋

吴安国 字镇卿，丽水人。宣和初，上舍释褐，徽宗奇其文，擢第二。召入史馆，迁考功郎中，以太常少卿使金充贺正旦使。至伴馆，金人渝盟，欲胁服之，安国毅然正色曰：“我首可得，我节不可夺。”金人不敢犯。靖康初，遣还。后知袁州。

姜绶 丽水人。宣和中，平睦寇有功，补承节郎。靖康初，金人犯汴，募忠勇士赍蜡书往南京调兵赴援，绶以忠翊郎应募。乃剖股藏书，缒下南壁，为逻骑所获，厉声骂之，遂被害。建炎中，诏官其子特立补承信郎。

祝汝秩 字君礼，丽水人。宣和中，方腊起睦州，寇诸郡。汝秩诣阙上书，乞为讨贼先锋，补承信郎，即领兵解郭太尉围。至台州，复捕腊余党，为贼所害。

梁孚将 丽水人。宣和间，睦寇方腊犯郡境，孚将与兄孚光、弟孚锡、孚惠，纠合懿德、宣慈、应和三乡民，戮力与贼战，贼将洪载逃去，郡闻于朝。会衢寇倪从庆啸聚，朝廷乃召孚将兄弟剿贼。贼平，赏以爵，孚光以让孚将授迪功郎。韩元吉记其事，碑在宣平县东岩。

何绂 字叔章，丽水人。靖康初，金人犯汴，诏募义勇，绂率百人应募，补进义副尉。至颖上县，三战马奔，为柘木所支，遂陷阵亡。

祝永之 字樗年，丽水人。以世赏授和州尉。靖康初，金人入和州，守令俱遁，永之独部乡民城守，尽室被害，州人乃推永之为守，后知滁州。

祝公明 丽水人。主太原府孟县簿，子陶为唐州司户掾。靖康中，金人犯河东，令弃官去，公明摄县事，率保甲入援围守，逾年城陷，死之。中原失守，陶亦死官所。建炎时，赠公明承事郎。

章云就 丽水人。建炎四年，溃兵官仪破婺州，将逼郡境，州将募能说之者，云就应命往，遇于荆坑，喻以祸福，贼许诺，与俱至城下。会官军掩袭，贼以为卖己，杀之。子驹，登绍兴十八年进士。

朱光 字不尘，丽水人。绍定二年，登进士第。尉襄阳，摄均州录事。端平丙申，均倅北人范用吉以城叛，光谕之，不从；责之，又不从。遂死于难。朝廷旌其忠，赠通直郎，官一子。敕曰：往岁北人以均城叛，尔光摄郡决曹，责以忠孝，遂遭执缚，毙于刀锯。后

三年职兵铃者，始白其事于朝，有司考阅铨籍，龙飞榜进士也。呜呼！尔死得其所，若朕之尽伤何！赠以京秩，录其遗孤，庶使忠魂无复遗恨。弟时，登端平二年进士。

吴思齐 字子善，丽水人。祖深，为永康陈亮婿，遂家永康。父邃，官至朝散郎。思齐少颖悟，以词章知名。由任子入官，监新城税，调嘉兴县丞，善决狱。未几，迁饶州节制司，准备差遣。时丞相贾似道贵戚谢堂，力能生杀人，思齐以小官中其讳恶，人为危之，思齐弗顾也。俄不愿仕，流寓桐庐。值宋改物，家无儋石，有劝之仕者，辄谢曰：“譬犹处子已嫁，不能更二夫也。”思齐天性直恣，知是非不知毁誉。与婺州方凤、福州谢翱游诸名山，酒酣，辄望天末恸哭。大德间卒，年六十四。

柳味道 丽水人。宋亡，浮云乡人柳机察为寇，逼味道同起攻掠，味道誓不为非义。寇怒，缢之于松而胁之，味道口占云：“国破家亦破，身穷命亦穷。浮云诸逆贼，送我上青松。”竟死于松下。案：旧志列入云和人物，称明正德间，山寇窃发，口占一绝，缢于松下。考明初叶世杰《草木子》已载其事。“国破”、“浮云”诸语，亦宋末之明证，与正德间时事不合。旧志失考误载，今从《草木子》更正。

刘倚友 字梦泽，青田人。登政和进士，宰开封有声。靖康间，金人犯阙，受檄为东壁弹劾官，登城巡视，为金人所获，胁使降，不屈死之。

林融 青田人。仕宋为提刑。融忿宋社沦亡，潜归九都牙阳，起兵兴复。兵败，被擒送燕，元世祖义而释之。融归，复起兵，遣参政高兴来御，力屈死之。

詹度 字世安，缙云人。宣和中，为燕山路安抚使，奏郭药师不可任，改帅中山，战守忠勤，钦宗御书奖之曰：“尔秉节不移，婴城固守，能出奇策，屡挫贼锋。昔张许之守睢阳、二颜之守朔郡，不足为卿道。”除资政殿大学士、信国公。后药师叛，果如度言。

王达 缙云人。宣和间，方腊寇掠缙云，势甚猖獗，县尉詹良

臣死于难。达率壮勇从间道至仙居，会吕师襄为内应，取道约官军夹攻之，遂大破贼。不伐功，不受赏。卒之日，乡人立祠祀之，封忠烈侯。

詹友 缙云人。以父适荫知雍州。靖康中，金人犯汴，友从北狩，金授以官，不就，死之。

梅宽夫 字伯大，缙云人。调慈谿尉。德祐初，摄知县事，率义勇应文天祥至常州，战败死之。尝师滕璘，得考亭之学。所著《裕堂讲义》，刻于乡校。

王仁孙 字汝善，松阳人。辟入国学，时相贾似道以母忧起复，毅然率同舍生启、博士陈著诣阙上书切谏：以似道罪恶昭彰，愚夫愚妇亦思逐之。今天夺其母，是代陛下行罚也。书上，不报。似道怒，欲远窜之，以上不可，乃止。遂谢病归。及宋社既屋，乃大恸，以不能兴复为憾。先儒程复深尝称为忠志之士云。

程垲 字元爽，松阳人。樟四世孙。调海门簿，慷慨激烈，每念世受国恩。宋亡，弃官归。自伤亡国之臣，即戴冠为道士，建太极阳明书院居之。自称神阳先生。

龚楫 遂昌人。工部侍郎龚原之子、颍川文学龚敦颐之父也。因原谪和州而卒，楫遂家焉。仕至兵部侍郎。金人陷郡县，楫忿恚不食。兀术据和州，楫率僮袭之。会金救兵至，楫麾其众曰：“今日斗死，亦足为义士。”不克而死。见《金史》。

赵育才 遂昌人。政和中，为武学生，膂力绝伦。方腊叛，与邓熹父子集翘壮相犄角，邑人恃以不乱。时松阳群盗侵掠及遂昌，乃率所部格于孟山前。贼势张甚，手射杀数辈，死于礮下。

何志同 字彦时，龙泉人。元祐进士。初，校雠麟阁。靖康，余虏寇颍昌，守臣曾开惧，宰相以志同代。至郡，励士死战，会虏大至，不敌，城陷。志同委子女，挺身出，招散亡。是时，高宗以大元帅开府济阳，志同率范垲等三十骑赴之。先志同尝密启：南都，祖宗兴王地，请正位号。及上移蹕南都，复申前奏，从之。以志同摄

大尹。未几，罢归。

吴枢 龙泉人。登政和进士，以节概自许。靖康初，诏募入使金者，枢毅然请行。既至，长揖不屈，金人欲烹之，枢色无少变。金主重其为人，遣还。

张漳 龙泉人。绍兴初，以秉义郎充金国通问副使，金人胁以拜跪，正使唯唯，漳独不屈，遂遇害。上嘉其忠节，官其子越为保义郎。

鲍廉 龙泉人。侍郎鲍度兄。知临江军，守城而死。子志及、志大，俱登第。

元

徐伯龙 青田人，家南田。至正甲午，贼起，总管官王某将兵抵南田，怯不敢进，伯龙诣军门请身先杀贼，总管官授以松阳县尉。牒明日大战，自旦达暮，兵势稍却，伯龙大呼直前，斩数十级，为贼所害。妻夏氏，以贞节闻。

洪俊 字克明，青田人。至正间，由儒士授温州竹木场提举。时方谷珍寇温州，欲潜归往行省请计，未行，匿于罗峰下，谷珍遣人获之。俊大骂，引刀自刎。

张进九 青田人。至正乙未，八都贼起，进九被缚诱降，贼加刃于颈，不屈，被杀。

林谏 字格非，青田人。仕元，屡立战功，官至兵部侍郎，赐曲陶郡伯，署枢密院事。知元运将亡，作诗遣侄南归，泣下沾襟。诗曰：清秋送侄出都门，别泪临风堕酒樽。在客岂无乡井念，为官肯负国朝恩。鹤鸽飞疾家偏远，塞雁行稀日欲昏。独上居庸最高处，回头一望一消魂。又以中国宗祀不可绝，并写其像，遗从弟询。诗曰：泪写血书寄吾弟，早令昂侄继吾宗。闻者哀而和之。明兵至通州，从驾北迁沙漠，人谓不失臣节云。事详《孤树哀谈》。

季珍 青田人。性骁勇。元末，寇掠郡邑，珍率众御敌于邑西